

Ukweli Unaobadilisha

Maana Neno la Mungu li hai, tena lina nguvu, tena lina ukali kuliko upanga uwao wote ukatao kuwili, tena lachoma hata kuzigawanya nafsi na roho, na viungo na mafuta yaliyomo ndani yake; tena li jepesi kuyatambua mawazo na makusudi ya moyo—**Waebrania 4:12**.

Ukweli wa Biblia, ukihifadhiwa moyoni na akilini na kutiwa maishani, unasadikisha na kuongoa roho, kubadili tabia na kufariji na kuinua moyo.... Neno linawafanya wenye kiburi kuwa wanyenyekevu, wakaidi kuwa wapole na kutubu, wasiotii kuwa watii. Tabia za dhambi zilizo asili kwa mwanadamu zimeunganishwa na matendo ya kila siku. Neno hukatilia mbali tamaa za mwili. Huyatambua mawazo na makusudi ya akili. Hutenganisha viungo na mafuta na kukatilia mbali tamaa za mwili, na kuwafanya watu kuwa tayari kuteseka kwa ajili ya Bwana wao.

Huduma ya Kristo ni jambo la mbinguni, takatifu na lenye baraka. Neno la Mungu linapaswa kuchunguzwa kwa bidii, kwa maana huduma ya Neno hugundua ukosefu katika tabia zetu na kutufundisha kwamba utakaso wa Roho ni kazi iliyoundwa na mbingu, ikiwakilisha katika Kristo Yesu ukamilifu wa kweli ambao kama ukidumishwa utakuwa ukamilifu kamili kwa ajili ya kila roho. Tunafundishwa katika mistari ya Biblia kuwa wakamilifu katika kufanana na Kristo na kuuona uso wa Baba ndani Yake ambaye Aliyatoa maisha Yake kwa ajili ya kuokoa roho.

Ikiwa u Mkristo mwerevu utadumisha uhai wa kidini na wala hutavunjwa moyo na matatizo.... Utafanya kazi ya Mungu katika huzuni kadhalika na katika utukufu, kivulini vile vile na juani, wakati wa majaribu na wakati wa amani. Ukweli lazima uthaminiwe moyoni mwako na kuunganishwa pia katika utu wako, ili kwamba pasiwepo na jaribu wala dai litakaloweza kukuvuta ili ukubaliane na mapendekezo au mitego ya Shetani. Ukweli ni wa thamani. Umeleta mabadiliko muhimu maishani na katika tabia, ukiweka mvuto wenye nguvu juu ya maneno, mwenendo, mawazo na uzoefu. Mtu anayeupokea ukweli huishi chini ya ushawishi wake na kutambua ukweli mkuu wa mambo ya milele. Anaishi si kwa ajili yake mwenyewe, bali kwa ajili ya Yesu Kristo aliyemfia. Kwa mtu huyo, Mungu anadumu na ni mtambuzi yakinifu wa maneno na matendo yake yote.